

Headlines

- जम्मू प्रांतै दे पुंछ ते कठुआ जिले च अज्ज आतंकवादिएं ते सुरक्षा बलें बश्कार द'ऊं टाकरे शुरू।
- अमित शाह होरें आखेआ ऐ जे बीजेपी जम्मू-कश्मीर च दफा 370 गी कदें बहाल नेई होन देग। पाकिस्तान दे कब्जे आला जम्मू-कश्मीर भारत दा हिस्सा, आतंकवाद दे चलदे पाकिस्तान कन्ने कोई गल्लबात नेई होई सकदी।
- पैहले गेड़ दे मतदान कोला पैहले मुख्ब चुनांस अधिकारी होरें नियम-कनून नाफस करने आह्लिएं 22 एजेंसिएं दी बैठक सद्दी। पूरी चाल्ली सुतंत्र, साफ-सुथरे, पारदर्शी ते जवाबदेह चुनांस दा भरोसा दोआया।
- सरकार नै घाटी च नौकरी करा'रदे जम्मू दे रौहने आले सरकारी मलाजमें लेई वोट पाने लेई त्रऊं दिनें दी छुट्टी दा ऐलान कीता ऐ।

<><><><><><>

Encounter-Poonch

जम्मू-कश्मीर च विधानसभा चुनां दे पैहले गेड़ दे मतदान गी हून जिसलै दऊं त्रै दिन गै बाकी रेही गेदे न, अज्ज जम्मू प्रांतै दे दऊं जिलें च आतंकवादिएं कन्नै टाकरे चला करदे न। पैहला टाकरा पुंछ जिले च आतंकवादिएं ते सुरक्षा बलें बश्कार इक्क टाकरा भखी पेदा ऐ। जानकारी मुजब जिले दे पठानातीर इलाके च किश आतंकवादिएं दी मजूदगी बारै थ्होई दी इक पक्की सूह दी बिनाह पर कार्रवाई करदे होई कल संज्ञा मकामी पुलस ते फौज नै इलाके गी घेरिए तुपाई आली कार्रवाई शुरू कीती। कार्रवाई दौरान अज्ज उत्थे छप्पे दे आतंकवादिएं, जिंदी गिनत्री 2 कोला 3 दे बिच्च दस्सी जा रदी ऐ, सुरक्षाबलें पर गोलीबारी कीती जेदे पर जवाबी कार्रवाई कीती गेई। ताजा जानकारी मुजब दऊं तरफा गोलीबारी रूकी-रूकिए जारी ऐ। बादू बल बी टाकरे आली थाहरै पर भेजी दित्ते गेदे न। होर ब्यौरे बी बलगेया जा'रदा ऐ। तोआई कठुआ जिले दे बनी इलाके च बी अज्ज दपैहरी लै इक टाक्करा छिड़ी पेदा ऐ। इस बारे जानकारी दिंदे होई ए.डी.जी.पी जम्मू होरें दस्सेया जे आतंकवादिएं दी मजूदगी बारै इक सूह थ्होने पर कठुआ दे बनी इलाके च तुपाई आली कार्रवाई शुरू कीती गेई जिस दौरान आतंकवादिएं कन्ने सामना होने

पर किश चिरै लेई दो तरफा गोलीबारी बी होई ऐ। सुरक्षा बलें इलाके गी घेरी लेदा ऐ ते होर ब्यौरे गी बलगेया जा रदा ऐ।

<><><><><><>

Congress-Terror

पिछले 24 घंटें दौरान जम्मू च दऊं कोला मते टाकरें दी पछौक्कड़ै च कांग्रेस पार्टी नै केंद्र पर आरोप लाया ऐ जे ओहू आतंकवाद पर काबू पाने च नकाम रेही ऐ। पार्टी प्रवक्ता सुप्रिया श्रीनाते होरें श्रीनगर च इक प्रेस कांफ्रेंस च आखेआ जे जदूं दा प्रधानमंत्री मोदी होरें त्री बारी अपना ओदा साम्बेया ऐ, छड़े 98 दिनें च जम्मू-कश्मीर च 25 आतंकी हमले होए न पर केंद्र सरकार दफा 370 ढहाए जाने दे बाद अमन ब्हाली दे बड्डे-बड्डे दावे करा करदी ऐ। उनें आखेआ जे हालिया आतंकी हमले च 21 सुरक्षाकर्मी ते 15 आम निगरान मारे गेन।

<><><><><><>

NC-Jammu

जम्मू-कश्मीर नेशनल कांफ्रेंस दे सुबाई प्रधान रत्न लाल गुप्ता होरें बीजेपी नेता तरूण चुग हुंदे उस बयान दी नुख्ताचीनी कीती ऐ जेदे च उनें नेशनल कांफ्रेंस पर आतंकवाद दे बादे दा दोष लाया हा। गुप्ता होरें आखेआ जे एहू आरोप बेबुनियाद न। उनें बीजेपी गी पुच्छेया जे डबल इंजन दी सरकार दे बावजूद ओहू जम्मू-कश्मीर चा आतंकवाद दा खात्मा कीहू नेई करी सकी।

<><><><><><>

Amit-Shah

केंद्री गृह मंत्री अमित शाह होरें दफा 370 दे खलाफ ते जम्मू-कश्मीर दे झंडे गी परतियै आनने खलाफ अपना कड़ा रूख दोहराया। एन.सी ते कांग्रेस सरकार इनें दौनें मुद्दें गी पूरा करना चाहंदी ऐ। जम्मू आधारित अखबारै दे इक्क इंटरव्यू च गल्ल करदे होई शाह होरें आखेआ जे इस बेल्ले चला'रदी सरकारै इत्थूं दे युवाएं च सकारात्मक बदलाव आहिनए जम्मू-कश्मीर गी नमां मोड़ दित्ता ऐ ते हून कश्मीर दे युवा पत्थर नेई फगड़ियै राश्ट्रीय झंडा फगड़दे न, जेड़ी स्हाढी बड़ी गै बड्डी उपलब्धि ऐ। शाह होरें एन.सी ते कांग्रेस दी आलोचना करदे होई आखेआ जे एहू सरकारां गुज्जर, बकरवाल, प्हाड़ी, दलित ते ओबीसी समाज दे आरक्षण गी खत्म करना चाहंदी ऐ। उनें आखेआ जे अब्दुल्ला ते मुफ्ती दी हाल च होए दे लोकसभा चुनाएं च हार एहू दर्शादी ऐ जे लोक केहडे राजनैतिक नेतृत्व गी आहनना चाहंदे न। उनें इब्बी आखेआ जे उंदी सरकार

पाकिस्तान कन्ने कोई बी गल्लबात नेई करोग जिन्नै चिर आतंकवाद गी नेई मकाया जंदा ऐ की जे मुल्लखै दी सुरक्षा सब्बनें शा पेहले ऐ।

<><><><><><>

NC-Omar

नेशनल कांफ्रेंस दे उप प्रधान उमर अब्दुल्ला होरें अज्ज दोष लाया ऐ जे पिछले 10एं बरें दौरान प्रधानमंत्री नरेंद्र मोदी होर जम्मू-कश्मीर दे लोकें कन्नै कीते गेदे वायदें गी भुल्ली गेदे न। उमर अब्दुल्ला होरें एहू टिप्पणी प्रधानमंत्री हुंदे बारै पुच्छे गेदे इक सोआलै दे परते च कीती जिनें हाल दे अपने डोडा दौरै दौरान इक्क चुनां रैली च विकास बाद्दे बारै केई वायदे कीते हे। उनें आखेआ जे प्रधानमंत्री मोदी होरें गी जम्मू-कश्मीर दे लोकें गी स्हाब देना लोड्चदा ऐ जे पिछले 10एं बरें दौरान डबल इंजन दी सरकार दे बावजूद उनें केहू किश कीता ऐ।

<><><><><><>

Kejriwal-Resignation

दिल्ली दे मुखमंत्री अरविंद केजरी वाल होरें अज्ज घोषणा कीती ऐ जे दऊं दिनें दे बाद ओहू मुखमंत्री दे ओहदे परा इस्तीफा देई देडनं उनें आखेआ जे औदे किश दिनें च आम आदमी पार्टी दे विधायकें दी इक बैठक सद्दी जाग जेदे च नमां मुखमंत्री चुनने बारै फैसला लैता जाग। केजरीवाल होरें मंग कीती जे दिल्ली विधानसभा चुनां जेह्ड़े अगले बरे फरवरी म्हीने होने न ओहू इस्स बरे नवंबर म्हीने होने जा रदे महाराष्ट्र विधानसभा चुनां दे कन्नै गै करोआई लैते जान। राष्ट्रीय राजधानी च पार्टी दफ्तर च अज्ज अपने कारकूनें गी संबोधित करदे होई केजरीवाल होरें आखेआ कि जिच्चर आम जनता अपना फैसला नेई दिंदी ओहू मुखमंत्री दी कुर्सी पर नेई बौहडन। सुप्रीम कोई नै दिल्ली शराब नीति आले मामले च कल शुक्रवारें अरविंद केजरीवाल होरें गी जमानत दित्ती ही। तोआई बीजेपी नै केजरीवाल हुंदी इस्तीफे दी इस घोषणा गी लोकें दी हमदर्दी हासल करने दा इक ड्रामा करार दित्ता। इस बारे नमीं दिल्ली च मीडिया कन्नै गल्ल करदे होई पार्टी प्रवक्ता प्रदीप भंडारी होरें आखेआ जे अरविंद केजरीवाल हून समझी चुके दे न जे दिल्ली दे लोक हून उनेंगी इक ईमानदार देनता नेई मनदे।

<><><><><><>

CEO-JK

जम्मू कश्मीर च असैंबली दे चुनाएं गी पूरी पारदर्शिता ते बवस्था आले ढंगै सिर करोआने लेई मुख चुनां अधिकारी पी.के.पोले होरें निर्वाचन भवन रेल हैड कम्पलैक्स च कनून नाफिज करने आली 22 अजेंसिएं दे ऐह्लकारें दी इक बैठक सदी। इस मौके उनेंगी अजेंसिएं बश्कार तालमेल दे महत्व बारे जानकार बनाया गेआ। मुख चुनां अधिकारी होरें सरबंधत ऐह्लकारें पर जोर पाया जे ओहू पैहले गेइ दे चुनां शा तकरीबन 72 घंटे पैहले मतदाताएं गी शराब, नगदी ते नशीले पदार्थें सनें होरनें चीजें दा लालच देइयै अपने पक्ख च करने लेई कीती जाने आली गतिविधिएं खलाफ फौरी कारवाई जकीनी बनाना। पैहले गेइ दे तैहत ओंदी 18 सितम्बर गी कश्मीर घाटी दे पुलवामा, शोपियां, कुलगाम ते अनंतनपाग जिलें सनें जम्मू खित्ते दे डोडा, किश्तवाड ते रामबन जिलें दे कुल 24 असैंबली हल्कें च वोट पोआए जाने ना। सख्त निगरानी जकीनी बनाने लेई मुख चुनां अधिकारी होरें अजेंसिएं पर जोर पाया जे ओहू जम्मू ते श्रीनगर ब्हाई अड्डें अंदर दाखल होने ते उत्थुआं बाह्र निकलने आली सब्बने थाहें पर नेइमी तक्क रखना। इस्सै चाल्ली दी निगरानी सब्बने अंतर-राज्य चैक पोस्टें ते सरहद्दी चैक-पोस्टें पर जकीनी बनाने दें निर्देश जारी कीते गे। भारती चुनांस आयोग दे दिशा निर्देशें दी पालमा जकीनी बनाने दी जरूरतै पर जोर पांदे होई मुख चुनांस अधिकारी होरें आबकारी मैहकमे गी आखेआ जे ओहू आबकारी कनून मूजब सब्बनें बंदिशें दी सख्ती नै अमलावरी जकीनी बनाना।

<><><><><><>

Special-Leave

जम्मू-कश्मीर दी सरकारै जम्मू खित्ते दे मुलाजम जेडे घाटी च तैनात न, उनेंगी औने आहले विधानसभा चुनाएं च वोट पाने लेई त्रऊं दिनें दी छुट्टी दी घोषणा कीती। आम प्रशासनिक विभाग दे आर्डर मुजब एहू छुट्टी कश्मीर घाटी च तैनात होए दे जम्मू दे मुलाजमें लेई ना। एहदे शा पैहले कश्मीरी विस्थापित मुलाजम जेडे कश्मीर घाटी च तैनात हे, उनें बी वोट पाने लेई छुट्टी दित्ती गेई ही।

<><><><><><>

SVEEP-Awareness

कठुआ दे ब्लॉक कीड़ियां गंडेयाल च स्वीप दे हेठ मतदान जागरूकता आस्तै इक्क रैली कडुी गई। बक्ख-बक्ख सरकारी स्कूलें दे विद्यार्थिं इस रैली च नारे लांदे होई हिस्सा लैता ते जेड़े विद्यार्थी 18 बरें दे ते एहदे शा बद्द उम्मी दे हे, उंदा वोटर कार्ड लेई पंजीकरण बी कीता गेआ। विद्यार्थियें लोकें अगगे अपील कीती जे ओहू विधानसभा चुनाएं च वोट पाइयै अपना विधायक चुनन।



Run-HIV Aids Awareness

जम्मू-कश्मीर एड्स कंट्रोल सोसायटी नै कल जम्मू यूनिवर्सिटी च एचआईवी एड्स सरबंधित मसलें दी जागरूकता बदाने करी 5 किलोमीटर दी दौड़ दा आयोजन कीता। एहू दौड़ यू.टी सतह पर खेडू ते शारीरिक शिक्षा निदेशालय जम्मू यनिवर्सिटी दे विद्यार्थिं लेई रक्खी जेदा विषेसार हा “Youth for HIV/AIDS Awareness”। एहदे च बक्ख-बक्ख कालजें दे Red Ribbon Club दे 200 शा मते विद्यार्थिं हिस्सा लैता। रेड रन दे विजेताओं गी मुख परौहने सने बाकी परौहने सम्मानित कीता। इस दौड़ च महिलाएं च पैहली थ्हारै पर पारूल शर्मा नै ते मर्दे च रमन होर न। एहू दवें जम्मू यूनिवर्सिटी दे गै विद्यार्थी न। जम्मू-कश्मीर दे विजेता हुन राश्ट्र पैमाने उप्पर दौड़ मुकाबले च हिस्सा लैंगन जेड़ा औने आहले म्हीने च NACO राएं करोआया जाग।



GMC-Kathua

गवर्ननमेंट मेडिकल कॉलेज कठुआ नै अपना स्थापना दिवस मनाया। सेहत ते चिकित्सक शिक्षा दे अतिरिक्त सचिव चांद किशोर होरें जीएमसी दे प्रिंसीपल डॉ. सुरिंद्र अत्तरी होरें इस समारोह दा उद्घाटन कीता। चांद किशोर होरें आखेआ जे इस मेडिकल कॉलेज दे कई विद्यार्थिं अपना लक्ष्य पूरा करियै सफलता हासल कीती ऐ। उनें इब्बी आखेआ जे इस कालेज दी वजह कन्नै मकामी विद्यार्थिं गी शिक्षा ग्रहण करने आस्तै ते मकामी मरीजें गी इलाज आस्तै कुते बाहर नेई जाना पौंदा ऐ।



DHS-Rabies

राश्ट्रीय रैबीज नियंत्रण प्रोग्राम दी ट्रेनिंग ते समीक्षा लेई बैठक अज्ज जम्मू च सरकारी अस्पताल गांधी नगर च होई। इस बैठक दी अध्यक्षता जम्मू सेहत सरबंधी सेवा दे निदेशक डॉ. राकेश मगोत्रा होरें कीती। डॉ. हरजीत राय जेडे जम्मू खित्ते दे राज्य निगरान अधिकारी न, उनें सब्बनें भागीदारियें दा स्वागत कीता ते उनें एन.आर.सी.पी बारै दस्सेया। टिकाऊ विकास दे मकसदें चा इक्क मकसद 2030 तोडी कुत्ते दे बड्डने करी होने आले हल्काहू दी चुनौती गी भलेयां मकाना ऐ ते एन.आर.सी.पी मनुक्खें च हलकाहू करी होने आहिलियें मौतें गी घटाने पर कम्म करा'रदा ऐ। डॉ. राय होरं मेडिकल बैटनरी ते मुंसिपल खेत्तरें दे बश्कार इस मकसद गी पूरा करने लेई इक्कजुट होने दे महत्वै पर बी लौऽ पाई।

<><><><><><>

Doordarshan

दूरदर्शन अज्ज अपनी स्थापना दी 65मीं बरे गंड मना'रदा ऐ। मुल्वै च टेलीवीजन प्रसारण दी शुरूआत 15 सितंबर 1959 गी होई ही। जदूं उस बेल्ले दे राश्ट्रपति डॉ. राजेंद्र प्रसाद होरें एहदे पैहले प्रसारण दी शुरूआत कीती ही। अज्ज दूरदर्शन दा अपना इक्क व्यापक नेटवर्क ऐ ते अपने बलमूते पर एहू भारत दा सब्बनें शा बड्डा लोक प्रसारक ऐ जेदी पुज्ज हर दूर दरेडे इलाके तोडी बी ऐ। दूरदर्शन दे 6 राश्ट्रीय ते 22 क्षेत्रीय चैनलें पर 24 घैंटें प्रसारण हुंदा ऐ। एहदे अलावा दूरदर्शन दा इक अंतरराश्ट्रीय चैनल बी ऐ।

<><><><><><>